



西樓全集目錄卷十

七言絕句

競渡曲二首

觀音閣口號

熊尉祠二首

寧夏凱歌四首

閩中元夕曲四首

三月晦日送人之安南二首

西湖權歌四首



宮怨四首

東庄晚眺

遼西歌

西夏歌

懷林熙吉

得家信

燕京元夕竹枝詞四首

送人之徐聞令二首

長門怨

長信宮

青塚

楊白華

馬嵬驛

宮人斜

紅葉怨

金谷園

薛濤墳

蘇小墓

江上重別惟和兄弟

別瀚公

江上別諸兄弟四首

天游觀讀陳价夫徐勣陳鳴鶴林應起壁

間作悵然寄懷

度分水關二首

嚴陵釣臺二首

西寺訪朗公不遇聞有天竺之行二首

舟中寒食二首

姑蘇別玉生二首

別玉生後風雨大作復成一絕

同彥貽晚至惠山看二泉一軟而去

官橋懷古

郵亭見殘花

春盡

秋宮怨二首

夏日聞鶯

發芋原時振狂追送江滸贈以六絕卽席

歌之歔歔淚下舟次楊青有懷賦荅六首

潯陽懷古

哭張函一廣文六首

西湖雜咏十首

觀海十首

遊仙曲四首

約彭山人遊武夷阻雨大安驛撥悶三首

送閔壽卿山人遊武夷二首

建陽道中

武夷山下作

過呂梁

燕子樓

南旺湖

衰柳

寄陳子翼太學二首

春日雜興十二首

夏日雜興十二首

秋日雜興十二首

冬日雜興十二首

爲林山人悼妓四首

再送士文

黃昭質武部典試還

朝買廣陵羅姬同

載戲贈二首

丁酉紀事五首

壽游子介二首

官詞十首

三月晦日宿安德

荔枝曲十四首

爲林熙吉題冊子五首

張明府貽紫花布

長沙寄家信

阮江道中

入鎮遠

羅憲副署中叢桂忽降甘露爲賦二絕

哭徐惟和十二首

哀半

平播凱歌四首

寄宜春張令

湧泉寺邀江廷尉孟憲副盧叅戎宴眺五

首

昆明署中菊花將放余客句町不得一賞

寄孟憲副

過通海石門

李留後邀宴挹漢亭四首

均陽署中壽朱水部

三月晦日襄陽道中

遇真宮

柳梅祠

答楚王孫贈菊

答別朱季則四首

西樓全集目錄卷十終

西樓全集卷十

閩中鄧原岳汝高著

門人韓日纘緒仲訂

仲子慶棠編次

七言絕句

競渡曲二首

十里湖光爛不收
綠楊影裏采蓮舟
歌聲唱斷西山色
無數朱簾盡上鉤

其二

昨宵新水入溝河五兩風生水自波二十四橋
車馬隘遊人齊唱采菱歌

觀音閣口號

觀音閣前溪水流觀音閣上行人愁天涯汗漫
不歸去愧殺沙頭雙白鷗

熊尉祠二首

君是東南尉史才一時保障亦奇哉至今父老
還祠廟曾說當年破虜來

其二

一劍功成三十年海門東去淨風烟而今歌罷
迎神曲白馬橫戈亦可憐

寧夏凱歌四首

義旗西指落攬槍花馬池頭鼓角聲露布飛來
報明主誰知元帥是儒生

其二

將士如雲歌入關平明奪得賀蘭山軍前一夜
旄頭落莫放重圍片甲還

其三

黑雲擁日壓城頭，
赴赴元戎寔壯猷。
殲盡鯨鯢築京觀，
邊人從此罷防秋。

其四

軍中饗士日椎牛，
戰勝歸來盡拜侯。
自是廟堂神武在，
黃河依舊護秦州。

閩中元夕曲四首

今宵雨霽動新涼，
短拍長歌夜未央。
學得崑山齊按節，
還珠門外月如霜。

其二

邀來女伴轉三橋，
歌舞叢中落翠翹。
歸去春閨愁不寐，
更無腸斷似今宵。

其三

街頭寶炬夜初開，
一曲新詞怨落梅。
怪底佳人好粧束，
閩山廟裏看燈來。

其四

繡幙珠簾曲宴開，
梅花影裏玉山頽。
也知春色濃如酒，
可忍燈前不醉回。

三月晦日送人之安南二首

憐君匹馬向交州尊酒河橋肯暫留一日春光
應自惜滿天風雨不勝愁

其二

銅柱南頭問去津片雲片雨摠愁人殷勤看取
長條柳明日相逢不是春

西湖櫂歌四首

楊花如霰柳如烟宿雨初收水拍天惆悵西隄
春十里紅妝人在木蘭船

其二

荷花千柄碧層層湖水漣漪散鬱蒸待得晚涼
風乍起不知身在玉壺水

其三

漾漾波光蕩綺霞滿天風露冷仙槎夜深爽氣
侵人骨齊傍菰蘆看月華

其四

湖上西風吹鬢寒澄瀾閣外雪初殘扁舟暫艤
梅花島縹緲瑤臺十二闌

宮怨四首

金屋花開轉早鶯闌干倚遍綵雲橫東風似解
愁人意傳得晨朝警蹕聲

其二

春風暫到洗粧樓宮柳凝烟翠欲流自笑眉顰
還似柳不知若箇更多愁

其三

采采芳蘭手自紉可堪清怨翠蛾顰仙韶別院
教歌舞一度春風一度新

其四

銀漢光澄寶靨嬌瑤臺寒逼紫霞綃但教月色
長如此贏得嫦娥伴寂寥

東庄晚眺

雲黯郊原萬壑哀清尊落日共登臺林鴉散盡
愁將夕分得前山紫翠來

遼西歌

島夷橫海躡朝鮮都護提兵出塞年若說奇功
唯議款何須千騎更行邊

西夏曲

花馬池頭烽燧閒黃雲遙掛賀蘭山輕裘自有
羊開府不遣胡兒得近關

懷林熙吉

旗亭別酒未成懽一望青山更渺漫纔對秋風
便相憶長安月色不勝寒

得家信

鄉書半載不曾通夢隔江南回鴈峰今日書來
情更惡沉吟不敢便開封

燕京元夕竹枝詞四首

西山霽雪散輕寒嫋嫋東風玉漏殘齊向天街
逐歌舞五陵春色月中看

其二

東華門外錦層層爭看流蘇百子燈寶炬燒殘
天未曉碧欄干上露華凝

其三

十里笙歌十里春梨花落處度香塵滿城珠翠
紛如綺怪得年年結束新

其四

御苑東頭燈市開游人如在錦雲堆從來 帝
里風光好日日看花拚醉回

送人之徐聞令二首

送爾單車入海隅石門山色下雙鳧江南驛使
尋常到庾嶺梅花得寄無

其二

雷陽南去路悠悠大海迴風天際流莫道宦遊
非故國衙齋一樣荔枝秋

長門怨

一入深宮暮復朝碧雲寂莫夜迢迢若言衰貌
難承寵何必黃金貯阿嬌

長信宮

長信秋風暗綺羅玉顏憔悴淚痕多空將舊恨
題團扇不及昭陽子夜歌

青塚

胡塵漠漠暗琵琶鬼魄猶憐漢路賒豔骨不銷
千載恨隴頭青草蘸黃沙

楊白華

楊花點點逐殘春飛出官牆踏作塵一望南天
消息斷東風愁殺倚樓人

馬嵬驛

羯鼓聲停軍夜呼君王倚杖更踏躑蛾眉宛轉
一朝盡猶憶宮中私語無

宮人斜

閉却泉臺無復春珠襦零落暗生塵當時亦有
承恩者墓草由來一樣新

紅葉怨

惆悵西風搖落秋多情却寄水東流由來一葉
輕如許載得宮中萬斛愁

金谷園

逶迤步障曲藏春歌舞回頭迹已陳惟有河陽
山上月當時曾見墜樓人

薛濤墳

三尺荒墳傍狹邪墳前流水遶桃花花開花落
東風老惆悵空林栖暮鴉

蘇小墓

油壁青驄不再逢
西陵猶有幾枝松
傷心怕問錢塘水
潮去潮來無定蹤

江上重別惟和兄弟

驛路風吹楊柳枝
江雲江雨不勝悲
也知遠道終須別
借得離筵駐片時

別瀚公

風雨蕭蕭江水渾
離亭相對共銷魂
知師不作人間別
笑指楊枝無一言

江上別諸兄弟四首

舟前握手盡離觴
日暮烟波正渺茫
疋馬蕭蕭西去路
江風吹鴈不成行

其二

驛樓分手卽天涯
一望雲山使我悲
客路風塵從此去
故園尊酒是何時

其三

江上流連幾日程
隔山愁聽鷓鴣聲
天寒日暮不成醉
楊柳依依是此情

其四

久客歸來不盡懽尊前無柰別離難他鄉亦道
春光好恨殺花開祗自看

天游觀讀陳价夫徐勣陳鳴鶴林應起壁
間作悵然寄懷

何年採藥入名山玉女峰頭控鶴還今日獨來
人不見白雲芳草水潺潺

度分水關二首

山頭風雪水浪浪遠道其如客髮霜咫尺關門
分楚越可堪今日落他鄉

其二

馬首西行關吏迎回頭雨雪杳江城出門便覺
風烟隔聽得山歌是楚聲

嚴陵釣臺二首

當時脫屣入青山一着羊裘永不還但說塵緣
從此斷更留踪跡在人間

其二

風塵作客思依依滄海猶存舊釣磯今日臺前
重惆悵扁舟此去幾時歸

西寺訪朗公不遇聞有天竺之行
春風一棹語兒溪楊柳低垂鳥自啼孤錫不知
何處落白雲遙掛武林西

其二

門前日午不聞鐘師去西湖第幾峰咫尺禪關
不相見更從何處問南宗

舟中寒食二首

楊柳春風縮暮潮姑蘇城外繫蘭橈更堪客裏
逢寒食故國音書久寂寥

其二

惆悵佳辰草色新桃花處處度芳塵
畫船蕭鼓隨流水目斷橫塘十里春

姑蘇別玉生二首

日暮山深聞鷓鴣可堪尊酒共踟躕
姑蘇城外分携去一片風帆下太湖

其二

襍被西遊一劍閒春風吹入道場山
憑君莫戀烏程酒醉臥苕溪不肯還

別玉生後風雨大作復成一絕

匆匆解纜不知愁別去其如雙淚流一夜夢回
風雨惡片雲東斷是湖州

同彥貽晚至惠山看二泉一軟而去

春雲漠漠水潺潺客到應誇嗽玉還昏黑更期
峰頂望隔林烟磬響空山

官橋懷古

官橋故薛地田文食客處也

稷下風流說孟嘗高臺曲沼亦荒涼只今惟有
官橋柳無復當年俠骨香

郵亭見殘花

繁花落盡怨殘春漂泊還隨客路塵縱得東風
好相惜看來終是異鄉身

春盡

客舍蕭條對夕暉更堪春盡野花飛馬蹄欲逐
殘春去不信春歸客未歸

秋宮怨二首

瑟瑟涼風吹玉珂銀屏寂莫柰愁何可憐月落

芙蓉冷一夜秋深墜葉多

其二

露下銀床落井梧捲簾愁聽夜啼烏怪來秋色
淒涼甚知入昭陽殿裏無

夏日聞鶯

綠暗郊原楊柳斜客中倍自惜年華春光已逐
東風去怕聽鶯聲對落花

發芋原時振狂追送江潯贈以六絕卽席
歌之歔歔淚下舟次楊青有懷賦荅六首

江頭惜別不勝情一唱陽關黯自驚兩岫蕭蕭
風雨惡那堪更聽斷腸聲

其二

勞君相送岳江亭水色山光共杳冥今日回頭
天萬里扁舟寂莫過楊青

其三

一別江樓楊柳新於今飄絮逐征塵不堪更渡
黃河水風起沙飛愁殺人

其四

我客天涯女索居山中生事近何如可憐春鴈
歸飛盡不見南來一字書

其五

一室蕭然越水濱山人原是白龍君
蘆中何處尋踪跡夢斷江頭千頃雲

其六

聞君欲作粵東遊庾嶺梅花黯自愁
但使出山嘲小草可能容易客羅浮

潯陽懷古

楓葉蕭蕭江上秋琵琶一曲不勝愁
淒涼最是潯陽水落日無人只自流

哭張函一廣文六首

風雨蕭蕭易水濱圖書千卷盡堪焚
淒涼一夜文星殞冷落西山幾片雲

其二

廣文齋冷客偏多岍幘相看只醉歌
怪得今朝車馬絕酒壚寂莫更誰過

其三

伏枕經時病未蘇一尊相對謾踟躕
花開花落須臾事腸斷燕山舊酒徒

其四

一片青氈宦計疎生涯蕭索更何如
篋中猶喜遺編在半世辛勤爲著書

其五

醉來白眼太憑陵處處青山興可乘
化去定應遊帝所蓬山亦有酒如澗

其六

汶水東廻卽岱宗風流還許躡仙蹤
君今歸去迎陽洞來往長栖日觀峯

西湖雜咏十首

何處飛來靈鷲峯白雲長鎖翠芙蓉
坐看東海扶桑外湧出金光千萬重

鷲嶺觀曦

其二

石罅流泉一派清井痕苔冷露華生
渟泓疑是蛟龍壑試聽夜來風雨聲

龍泓漱玉

其三

月隱空山雲亂飛
夜涼零露濕人衣
梅花開落春如舊
不見湖邊放鶴歸

孤山梅月

其四

靈隱山前風怒號
松林遙接北峯高
游人馬上聞天籟
魂斷揚州八月濤

九里松風

其五

湖頭春晚草萋萋
烟水微茫鳥亂啼
欸乃一聲人不見
小舟撐過斷橋西

六橋烟柳

其六

鐘聲隱隱暮烟消
天竺峯高見海潮
一片餘霞散成綺
幾回誤作赤城標

三竺一晚霞

其七

桃花亂落水濺濺
無數殘紅積水邊
自是芳華人共惜
縱令飄泊亦堪憐

桃溪春雨

其八

仄迳懸厓日景微
淋漓空翠落晴暉
洞門詰曲深如許
恠得雲來逗不歸

石屋晴雲

其九

湖上微風生晚涼舞裙嬌引藕花香木蘭轉入
花深處鏡裏誰知不是粧

彩鷁紅粧

其十

水邊楊柳弱如絲嬾嬾東風不自持十錦堂前

千萬樹宜人最是早春時

錦塘春柳

觀海十首

鹽官城外海雲平烟水茫茫風日晴飛度弱流
三萬里金鼇頂上看潮生

其二

曠曠曙色掛扶桑貝闕波翻紫電光百道霓旌
齊上下金輪湧出水中央

其三

早潮初縮散晴烟極目波光淨可憐海上神山
皆歷歷雲中露出小如拳

其四

蜃氣微茫海市開紫雲千頃擁樓臺波平風軟
澄如鏡親見仙人三島來

其五

朔風吹雪散芙蓉只尺雲開掛白龍千片銀冰
何處落潮來推倒海中峰

其六

雪裏嵯峨秦住山山前流水日潺湲可憐徐福
求仙去一逐樓船永不還

其七

千層巨浪欲西馳駕海橋荒砥柱歆怪得神人
能驅石不教秦帝見安期

其八

海畔諸峰雪未消瑤臺石室更岿嶷罡風吹落
瓊花冷日斷銀河一水遙

其九

憑欄一望靜無波烽燧樓空畫掩戈見說承平
無外事不須瀕海更防倭

其十

長隄百里嬌如虹香火猶傳砥柱功一帶桑田
鹽鹵地茫茫滄海正流東

遊仙曲四首

弱水茫茫清淺流蓬萊西是鳳麟洲玄都不隔
尋真路親見仙人十二樓

其二

金闕峻嶒白玉都紫雲千頃夜模糊丹房不下
歲蕤鎖竊得真形五嶽圖

其三

彩雲爲障玉爲橋一夜隨風度海遙清露滿身
雙袖濕碧空何處坐吹簫

其四

邀得仙人萼綠華蒼虬齊駕五雲車瑤池此日
重開宴飽看蟠桃千樹花

約彭山人遊武夷阻雨大安驛揆悶三首
誰憐風雨路行難百道飛流馬上看咫尺幔亭
何處問洞門深鎖白雲寒

其二

緘書爲報武夷君玉女峰頭幾片雲莫道山霧
能妬客不妨笙磬雨中聞

其三

溪頭水漲欲迷津
目斷虹橋彩幄新
莫便移文迴俗駕
同遊元有住山人

送閔壽卿山人遊武夷二首

曾向金山結草亭
人間聊復託沉冥
虹橋却赴曾孫宴
一曲遊仙夢裏聽

其二

十年對客說長生
買得靈山隱姓名
它日丹成生羽翰
蓬萊鸞鶴坐相迎

建陽道中

宿霧初收散曉霞
清溪百里帶晴沙
山城却訝霜風蚤
一片楓林二月花

武夷山下作

昔年曾謁武夷君
踏盡峰頭千片雲
今日幔亭山下路
虹橋仙樂不相聞

過呂梁

水驛蕭條楊柳黃
荒郊風急雁啼霜
不驚流沫三千尺
薄暮輕舟過呂梁

燕子樓

惆悵芳塵黯舞衣小樓春去落花飛可憐粉黛
成黃土愁見東風燕子歸

南旺湖

汶水至此北
流入衛河

榆柳蕭蕭兩岼秋片帆千里下齊州客中欲寄
思鄉淚汶水從今却北流

衰柳

殘枝瘦影不禁秋幾樹傷心湖水頭爲惜婆娑
生意盡更無茂苑舊風流

寄陳子翼太學二首

十年客路太參商望盡天涯各斷腸今日燕臺
重攜手不堪惆悵淚沾裳

其二

蕭蕭朔雪暗燕關歲晏風霜凋旅顏莫惜十千
同買醉酒壚猶未遯河山

田園雜興

并序

宋范石湖田園雜興諸詩大槩寫吳中風
土蓋唐人竹枝之流前輩典刑致足念也
余夏仲過家偶從屠田叔錄得一通讀之

自快因舟次閒暇率爾效顰餽釘吾鄉故
事比于里巷之曲分爲四景各十二章要
令田畯園丁人人可歌而已但范先生時
已退居一廬橫塘之上辟如老農老圃無
非實際余方逐物役何敢作英雄欺人卽
山中故業日就荒蕪又安得此貌言而稱
之雖然余本措大起于田間犁鋤斧柯幸
自無恙異日山隈水湄此景不乏使稚子
每歌一闋輒舉大白浮之罰余決筴之晚

也借以解嘲丙申八月晦日識

春日雜興十二首

茅舍新移近水涯東風送暖到山家不知春色
今多少一樹棠梨先着花

其二

甞出郊原計耦耕溪橋獨立雨新晴今年不怕
春無水聽得山鳩第一聲

其三

送神未已復迎神午夜堂中花燭新去歲秣田

贏十斛不妨多釀醉比隣

其四

官府行春咽管絃大家齊到甕城邊就中一種
田間曲貌出村粧絕可憐

其五

十戶齊輪欵福錢元宵風景樂新年神前燈燭
光如許忙殺村童夜不眠

其六

花朝前後是芳辰相約東村賽社神但願今年
田地好再來烹宰共嘗新

其七

土膏欲動雨連綿布穀聲聲催種田試向隴頭
高處望犁鋤都到北山前

其八

春雨霏霏春日遲田家纔及插秧時山歌十里
聲如沸絕勝吳儂唱竹枝

其九

寒食郊行作勝遊桑間處處有啼鳩人家澆墓

歸來晚折取松枝滿擔頭

其十

墟里蕭條三兩家短牆土舍自橫斜居人不解
蠶桑利一片荒山但種麻

其十一

莫道山家生計微荷鋤力作不愁饑春來喜得
多陰雨韭菜長青芥菜肥

其十二

雨後新茶及早收山泉石鼎試磁甌誰知劣
峰頭產勝却天池與虎丘

夏日雜興十二首

四月陰濃梅子黃田家摘取滿傾筐也知市遠
無珍果一任兒童日飽嘗

其二

三耘已了暫從容消息還應問老農但使北風
休作惡今年穩取十分冬

其三

原田高燥不通潮無柰前溪取水遙聽得桔槔

聲未了淋漓甘雨竟連宵

其四

朝來忽聽采蓮歌別浦龍舟競渡多社裏平安
無箇事不須巫媪爲驅儻

其五

門外方塘水欲平短蕪是處有蛙聲不知虫黽
關何事一夜營營聒到明

其六

炎蒸天氣日偏長赤脚蓬頭也不妨記取明朝
應作雨午來田水熱如湯

其七

槐陰茂密柳陰涼石枕方床一夢長直到日斜
纔睡覺好風吹送野蓮香

其八

紅綠參差露氣鮮荔枝今歲正當年山居清福
堪消受飽食還教樹下眠

其九

平疇百里菜花開勾引蜻蜓蛺蝶來謾說村庄

無好景大家看取錦雲堆

其十

山中睡起片塵無獨對南薰草閣孤更喜單方
唯一味晚厨清暑有香齋

其十一

買得腴田作越田誰知土產與時遷今年苦熱
越槌短斲足家供不賣錢

其十二

小池一畝傍田居半種蓮花半種魚客到不愁
供具少打魚沽酒擷園蔬

秋日雜興十二首

東菑一望黍離離却喜旬中風日宜大暑開倉
收穫早連延直到立秋時

其二

牛女年年說渡河良宵瓜果乞靈多天孫賜盡
人間巧野性從來柰拙何

其三

七月晡時雨候齊乍晴乍晦鳥爭啼前村刈稻

須乘早莫待淋漓水拍隄

其四

秋深禾黍各登場雨後還思插晚秧一歲再收
纔得食水田幸不畏年荒

其五

種田得穀亦奔波狼藉其如鳥雀何但得好收
從爾食筭來折耗也無多

其六

西風將雨淨泥場爨下旋聞新米香喚取隣翁
相對飲一杯慙愧老農忙

其七

明月團團似鑑開中秋好景暫徘徊滿街燈火
紛紜甚何處童孫闕塔來

其八

隴頭風緊日西懸村底兒童放紙鳶看到上頭
齊喝采微茫一點隔秋烟

其九

白鴈南翔天雨霜山中風景入重陽隣家乞得

茱萸酒見說東籬菊正黃

其十

水田十畝芋苗肥下有蹲鴟可療饑
爐火爨來還供客農家生計未全非

其十一

紫艷紅英一丈高花開真足伴持螯
客來共醉東籬下莫道徵君不姓陶

其十二

風味爭傳佛手柑奇香原自壓江南
時人且莫輕題品蘋果楊梅總不堪

冬日雜興十二首

十月山中氣尚溫小橋流水傍柴門
隔林煙樹青如染不比江南黃葉村

其二

東風浙浙破寒烟數點梅花着水邊
自是炎方剩得暖遊人却愛小春天

其三

採得冬青釀酒香瓦鑪煮出更清涼
纔傾一盞

陶然醉不減仙人碧玉漿

其四

楓落霜酣枰子黃西風吹動滿林香行人馬上
看如繡此是南中橘柚鄉

其五

平楚烟銷霜月高滿庭叢竹共蕭騷坐來不覺
衣裳冷添得蓑衣當布袍

其六

客到流連且命觴殘燈無焰不禁霜辟寒最有
菜羹飲醒酒還須橄欖湯

其七

颯颯西風雲欲崩荒郊朔氣太憑陵呼童速糴
荔枝火此物由來不耐冰

其八

飛霰紛紛臘已殘凍雲蕭瑟閉柴關兒童不識
風霜苦爭向溪邊疊雪山

其九

茅舍初成覆草新土炕無火莫嫌貧老翁曝背

前楹暖閱盡人間富貴春

其十

郭外罡風吹帽寒滿空飛雪更漫漫朝來失却
前村路壓壞溪南竹數竿

其十一

閒居無事惜年華玉曆頒來野老家知道臘前
春信到試將消息問梅花

其十二

簫鼓喧闐夜復除村中生事更何如雞豚蔬菓
家常有不待山妻隔歲儲

爲林山人悼妓四首

十季走馬狎平康買得名姬獨擅場一自鳳簫
聲斷絕不堪重覩舊衣裳

其二

妝成金屋貯蛾眉一夕花飛不自持唱罷新詞
更回首愁人無奈月斜時

其三

對面陽臺路已分傷心何處覓行雲芳魂不逐

蘅蕪夢那得仙人李少君

其四

琵琶絃絕綺羅灰
杜宇千聲喚不回
見說孤墳荒隴上
春來依舊野花開

再送士文

滿天風雨怨離群
客舍鶯聲不可聞
此去亦知非遠別
薊門殘雪又逢君

黃昭質武部典試還
朝買廣陵羅姬同

載戲贈二首

維揚佳麗古名都
艷質堪酬明月珠
笑向棗間彈一曲
侍兒元是小羅敷

其二

寶馬香車擁翠鬟
滿空風雪不知寒
恠來桃李花如許
更買芙蓉帳裏看

丁酉紀事五首

勅使身齎金虎符
但言開採足邊需
誰知閭里蕭條甚
淚盡中州柱史圖

其二

兩宮新建太輝煌鋪設還須七寶粧却惟海南
珠貝盡不教天子坐明堂

其三

經旬好雨慰三農聖主先論禱祀功玉帶磷
衣兼寶鈔中涓捧出大明宮

其四

琢成玉石巧盤蓮力盡千夫不肯前請看殿中
方寸地筭來多少水衡錢

其五

千群緹騎護中官朱押黃封濕未乾三百店房
都鎖却傍人不敢舉頭看

壽游子介二絕句

金門聊復託沉冥始信東方是歲星乞得大官
甘露酒與君長醉莫教醒

其二

俸錢盡給酒家胡但對青尊不用沽更勅後房
歌艷曲隔屏齊唱鳳將雛

宮詞十首

日侍金輿奉至尊椒風幸有別承恩同來女伴
俱零落含淚花前不敢言

其二

越綺吳紗別樣紅分明繡出百花叢中間更有
飛龍錦御手先頒第一宮

其三

綺閣瑤房午未開侍衣宮監各徘徊醉醒展轉
無人覺鸚鵡傳呼直日來

其四

可憐傾國寵方新花謝花開亦有因夢隔蘅蕪
消息斷武皇還憶李夫人

其五

露布朝馳自海東 聖皇歡宴萬年宮梨園齊
奏平蠻曲竟是何人汗馬功

其六

鑾輿避暑九層臺賜扇含風巧樣裁齊說今年
工製好詔書特勅守臣來

其七

閤門初啓日西沉曲宴流連夜漏深忽報外頭
封事急何方鑛使貢黃金

其八

明堂勅遣大長秋妙選民間第一流且喜婚期
將卜吉朝朝瑞氣傍龍樓

其九

中官走馬捷如飛內監傳宣盡賜緋昨夜新添
第九女大家拱手賀皇妃

其十

永陵宮女白蒙頭却憶當年侍冕旒最有
今皇能繼武太平垂拱不曾愁

三月晦日宿安德

客路傷春夢屢驚殘燈蕭瑟臥孤城可憐春事
今宵盡不見流鶯一兩聲

荔枝曲十四首

有引

舟過吳閫彭興祖以王百谷茉莉曲見示
翩翩竹枝餘響既抵虎林阻雨無可散悶
者戲作此曲擬之閩人伉直不能爲楊梅

左袒恐百谷見之又笑汝高癡乃爲草木
聚訟也彭興祖客閩中久業品嘗之當助
我口實不妨作鴻門項伯耳

其一

鳳皇山下荔枝園擇日開林市子喧一百銅錢
分一擔平明奔進合沙門

其二

纔交小暑日頻催一夜驚看錦繡堆蚤起香風
遍城郭人人都道荔枝來

其三

紅如鶴頂大如杯奪取頭籌滿擔回更怕午前
日色惡齊將青葉蓋頭來

其四

火山先出試嘗新只好山隈及水濱酸沁齒牙
形味劣果中比作掃除人

其五

荔枝高樹倒垂簷十尺長干兩刃尖摘下但憑
多少喫飽來還有水精鹽

其六

稍頭狐鼠捷如風
夜鷺經過樹樹空
高結茅樓敲竹夾
曉來添得照山紅

其七

麻繩高弔小筠籠
上下盤旋西復東
且喜今年風雨少
荔枝個個不生蟲

其八

千株傍水各成行
半是豪家郭外庄
最好五更乘露摘
噉時猶帶露華香

其九

珊瑚滿貯水晶盤
疑是仙人絳雪丹
飽食日須三百顆
石林無暑夏堂寒

其十

金盆漱灑碧波妍
一道霞光照眼鮮
何似婕妤初賜浴
玉肌三尺浸寒泉

其十一

綠袖紅綃錦隊齊
豐肌甘液壓枝低
吳兒可是饒輕薄
錯把楊梅共品題

其十二

萬樹搖風點翠苔不妨對客日千枚城中諸品
垂垂盡猶有吳航勝畫來

其十三

海中仙品果中王爭說多情十八娘月旦不知
誰第一看來畢竟狀元香

其十四

千林摘盡荔枝殘蜜漬鹽醃更晒乾不分側生
能損價可知輸却玉漿寒

爲林熙吉題冊子五首

斷橋荒徑草萋萋千頃流雲錦水西石磴如盤
分席坐隔溪垂柳聽鶯啼

其二

不待開帆不待潮枯槎聊當木蘭橈也知身外
無餘物只有詩囊共酒瓢

其三

松風颯颯散江臯攜得瑤琴手自操一夢醒來
清病骨不須枚叔賦觀濤

其四

山逕荒涼閉夕陽
隔林香氣識僧堂
鐘聲隱隱磬聲寂
供罷清齋禮法王

其五

積雪初晴寒未消
杖藜獨往意蕭蕭
苦吟却得梅花助
不忝風光在灞橋

張明府貽紫花布

雲間細布紫茸花
乞自關門令尹家
擬作華陽高士服
青山隨處弄烟霞

長沙寄家信

路出長沙秋欲殘
逢人再四報平安
謾言書裡多珍重
纔過湘沅寄信難

沅江道中

征途千里入湘沅
何處看山不斷魂
最是楚江秋色裏
可憐獨少一聲猿

入鎮遠

沅江南轉萬峰齊
回首愁雲隔五溪
只說夜郎天欲盡
單車更指夜郎西

羅憲副署中叢桂忽降甘露爲賦二絕
憐君藜桂小山傍那得金莖露可嘗但向枝頭
聊一吸不須神漢與天漿

其二

香風颯颯夜無塵幾點如膏露似真欲乞刀圭
消病渴馬卿元是倦遊人

哭徐惟和十二首

鄉音半載不曾來偶到開緘意屢猜忽報徐生
凶信至碧雞昏黑夜猿哀

其二

憶得臨行話別時床前媿媿坐譚詩單車纔指
湘沅路回首南天事可疑

其三

屈指交情二十年高山流水動相憐眼前無復
知音賞對客那能不斷絃

其四

長安慷慨酒人群俠氣憑陵欲吐雲易水只今
寒色甚悲歌千載不堪聞

其五

月鎖孤齋萬竹寒
秋風吹斷碧欄杆
葦床茶竈俱塵土
一夜嚴霜摧紫蘭

其六

平生結客少年場
咳唾如雲語自香
玉樹摧殘人不見
淒涼寶玦夜無光

其七

當年三謁武夷君
夢入峰頭鸞鶴群
便學徐仙同坐化
罡風吹散幔亭雲

其八

十年書劍走天涯
五字翩翩五色霞
一自玉樓賦成後
彩毫零落不開花

其九

一領青衫未破除
誰令曼倩老公車
槿花易謝瓊花死
冷落南州孺子盧

其十

寂寂幽居郭外扃
憶君命駕坐寒汀
年年烟月無窮恨
都向山陽遂裏聽

其十一

浪說犁鋤隱是真眼前丘壑更何人酒壚雖在
河山邈花落花開不見春

其十二

西南萬里乞歸遲他日墳頭哭豈知留取長松
堪挂劍白雲何處更相期

哀牢

馬頭疊嶂帶崇嵐客路驚逢三月三莫道去家
今萬里此身還在大江南

平播凱歌四首

義旗西指陣雲開親領雄兵百萬來帳下克徒
齊授首千年廟社一時灰

其二

勢窮還據海龍城鼓角無聲馬不鳴莫倚舊時
香火約行圍半是水南兵

其三

山後山前百道攻忽驚飛炮火連空城頭萬炬
明如晝知是誰人第一功

其四

可憐死士漫如雲樓櫓連山一夜焚自是運籌
歸幕府果然西塞勒奇勛

寄宜春張令

本嘉

宜春山水豫章西一夜猿聲過五谿忽憶美人
花發處楚天無際暮雲低

湧泉寺邀江廷尉孟憲副盧叅戎宴眺五
首

一逕青山十里遙白雲谷口坐相邀不須呵殿
驚村女拄杖前頭只酒瓢

其二

山隙流泉激雪飛石巖嵐翠濕人衣旛幢不動
柴門閉日暮老僧何處歸

其三

石邊水出忽濺雲飛瀑潺湲曲曲分試向蘭亭
問陳跡風流還說右將軍

其四

新釀真成竹葉青一尊相對共沈冥芒鞋踏遍

雲山路笑倚峰頭木末亭

其五

遊興離披酒興豪醉來白眼鬪風騷江山勝蹟
應如此可道登臨有我曹

昆明署中菊花將放余客句町不得一賞

寄孟憲副

惆悵東籬花事新臨行鄭重託西隣孟公本是
龍山客借與陶家作主人

過通海石門

層厓迢遞水潺潺嵐翠淋漓渺靄間客子不知
天萬里塞帷疑作建溪山

李留後邀宴挹漢亭四首

漢江如帶柳如烟亭榭新開閣道連上下
三十六分明天際出青蓮

其二

楓林瑟瑟正深秋雲散徐看漢水流日晏轅門
斗靜柳管月色度篁篔

其三

大旗獵獵馬蕭蕭
仗外青山送酒遙
一曲鏡歌人盡醉
甲光如水劍橫腰

其四

城頭突出小崆峒
三楚繁華指顧中
莫恠朝來多氣色
林端雙闕卽潛宮

均陽署中壽朱水部

開徧蟠桃春未闌
仙人飛珮玉珊珊
太和山主無供奉
乞得玄君九轉丹

三月晦日襄陽道中

一夕春歸柳暗催
天涯遊客自徘徊
大堤飛絮紛如雪
并逐東風去不回

遇真宮

真仙羽化去人間
鐵杖金衣色尚斑
丹竈天樂杳更餘
遺跡在空山

榔梅祠

榔梅花老樹凋殘
曾耐東風幾歲寒
自是瑤池天上種
竒葩那許世人看

答楚王孫贈菊

竹影蕭蕭散早衙滿庭秋色簇黃花南山只在東籬下愧殺柴桑處士家

答別朱季則四首

江頭飛絮白漫漫客子將歸春欲殘漢水東流經鄂渚思君不見獨憑闌

其二

萬頃波濤萬斛舟牙檣如戟狎江流夢中迷却巴陵道春雨春風無耐愁

其三

挹漢亭前春可憐使君醉態逸如仙酒壚徑作河山隔明歲相逢若箇邊

其四

五年辛苦逐邊州客况蕭蕭不可留遠道何日到還家贏得荔枝秋

西樓全集卷十終

